

東
華
續
錄

東華續錄

道光十二

臣王先謙敬編

臣周綱蕃恭校

秋七月戊子諭軍機大臣等據李鴻賓奏籌議海運事宜本年已不及行來年籌運之一百五十萬石雇用商船稍費招集恐難定其足數百五十萬之數擬將首二進業經渡黃北上之船俟交卸回空酌留二三十幫約可運米七八十萬石令其停候黃河以北無庸歸次一以濟本年接運之不及一以備來年海運之不敷此時約計首運回空將入江境卽再行接運趕抵通州該船來年既不須出運卸米後於北路衛河開河分泊守凍如雇覓海船或難如數可酌分數十萬石仍由內河轉運自較穩妥至運河淤厚處所多在淮城以北挑濬工程應自下游南路辦起本年冬季並來

年正二月將高寶一帶淤墊挑挖歲工專留上游極淤之地俟夏秋挑辦明年糧艘自南而來時當春夏之交洪澤湖水總可蓄至丈餘於頭閘濟運壩開放清水接濟猶可挽至高坂頭一帶起米過壩卽令北路守凍幫船迎至河口受載殊爲省事且暫放清水以濟舟行旋卽堵築興挑亦不至有誤清江閘等處挑工該幫船本年接運及來年迎運均按額給與行月口糧等項丁舵水手人等復得薪資食用俟下年渡黃歸次亦可趕運道光七年漕糧等語海運事宜前據琦善奏見飭藩司賀長齡親赴海口招徠商船籌議章程再行會奏並將本年滯漕二百萬石由豫東軍船及雇用民剝並淮安首進回空等幫分起接運赴通惟來年試行海運所雇沙船是否足資裝載一百五十萬石之數抑或挑漕運河俟清水蓄足另籌分運李鴻賓所奏是否可行著該督等會同妥議

具奏其另片鈔呈前河臣張伯行所撰居濟一得書內載回空糧

船出周家橋開草字河亦通行一條見在情形若何並著該督等

查明一併議奏○以多山爲左副都御史餉監大臣巴里坤○調韓文

綺爲雲南布政使以董瀄爲四川布政使張青選爲直隸按察使

由長蘆鹽運使遷○戊戌移湖北提標中營外委駐隨州雙河集撥鄖陽

施南武昌漢陽各營兵隸之○己亥 上臨故科爾沁郡王追贈

親王銜和碩額駙索特納木多布齋園居賜奠○諭軍機大臣等

據松廷等奏哲孟雄部長屢次懇請到卓木地方避暑及來藏瞻

禮一摺哲孟雄部長前因其來藏禮佛每次輒多妄請經文幹等

具奏當經降旨定以八年准其來藏一次未至八年卽行斥駁茲

據松廷等奏該部長因違賴喇嘛坐牀後屢次懇請瞻禮惟見距

該部長前次來藏之期僅止四年本應斥駁姑念達賴喇嘛坐牀

係屬吉祥善事該部長近年遵奉諭旨尙屬安靜此番懇請出於至誠著加恩准其暫來一次不准另有乞請仍遵前定章程再屆八年方准前來如未屆年限復行瀆請該駐藏大臣嚴行斥駁以示限制至該部長每年赴卓木地方避暑雖係從前常有之事達賴喇嘛等並不攔阻但卓木曲批乃唐古特境地該部長係自行前來今若明降諭旨准其每年在帕克哩以外居住數月該處係藏外一小部落素尙恭順又有駐防官兵及帕克哩營官等稽察防範或不至別滋事端第外夷貪鄙性成安保其日久不妄生覬覦若附近別部落紛紛效尤又將何以處之邊圉緊要不可不防其漸松廷等率請奉旨後咨明轉飭遵照令該部長開報人數准其前來避暑殊屬不合著不准行松廷等惟當告知噶勒丹錫呼圖薩瑪第巴克什班禪額爾德尼以哲孟雄部長每年來至藏界

地方避暑相沿已久此時若嚴行驅逐亦非字小之道應由伊等體察情形或照從前容其暫住過時卽催令回巢該駐藏大臣等仍隨時查察毋許該部長在藏境逗留並嚴飭駐防及帕克哩營官等不時防範稽察以靖邊徼○辛丑諭訥爾經額奏通籌軍船接運情形議請展限一摺本年東省接運南糧前經琦善奏准展至七月十五日爲止儻再過期卽行原船長運抵通茲據訥爾經額查明江省剝運各幫米船見在尙有未入東境者計算程途斷不能於限內一律趕到著照所請准其再行推展半月以本年七月底爲止所有江省運到之米先由豫東軍船接運隨兌隨行毋任停延其續剝米石再交封雇民船接運仍趕緊嚴催首進幫船回空接運江廣漕糧務使本年全漕早抵通倉不許稍有遲誤至回空限期既緊歸次收兌亦關緊要著該護撫隨時察看情形妥

速辦理○以興科爲四川按察使

由湖北荆宜施道遷

○工部尚書初彭齡

卒予葬卹如例○丙午諭致仕大學士戴均元宣力中外歷有年

所上年秋閒以衰老乞休俯允所請俾得怡志林泉藉資頤養本

年十一月十六日爲伊八十生辰宜沛恩施以昭優眷除另行頒

賞外所有前降頂帶三級著加恩開復仍賞還一品頂帶用示朕

錫福耆臣至意○戊申諭軍機大臣等前敕各該督撫籌議海運

折漕事宜原爲來年疏治河道之計見據陸續覆奏海運一事惟

江蘇可以試辦然亦不過運米一百五十萬石其餘各省漕米

既不能槩由海運而折漕亦多窒礙紛擾是浙江江廣額漕及江

蘇海運餘贖漕米皆須籌畫河運惟本年高堰石工竣後將來收

蓄清水情形若何尙難豫定設蓄清丈尺仍不能敵黃明年重運

經臨若仍開放禦黃壩復有頂阻倒灌之虞豈不是一誤再誤朕

思海運而外惟盤壩接運既可使漕糧悉數抵通而禦黃壩不開亦可免湖河受病黃水不倒灌入運即可併力東趨以收刷沙之益彼時湖渚亦當充裕俾專刷運河之淤以濟漕行明年若能如此辦理庶河漕兩有裨益至道光七年可以仍復舊制豈不較折漕濟工停運治河爲得計耶第盤壩經費應如何籌畫不致多糜接運船隻應如何調撥可以敷用均須通盤計慮周妥琦善等接奉此旨後會同體察情形悉心覈議據實具奏不可因係朕特交籌議稍存成見總期計出萬全庶不至一誤再誤也○辛亥諭朕因宗室生齒日繁諭令縣課等議立章程用昭懲勸前經縣課等條奏各事宜復交大學士軍機大臣會同各該衙門詳議茲據托津等分別准駁具奏朕詳加披閱內嚴辦滋事一條向例宗室罪犯止分別折罰圈禁惟法輕則日久生玩必應嚴定律令庶辟以

止辟多所保全嗣後著管宗人府王公等隨時稽察彈壓並出示曉諭凡被害之人卽據實向問刑衙門呈訴並飭番役等一體查拏送官究治其犯笞杖軍流徒等罪審係不安本分者卽照此次議定科條分別加責實發如有釀成命案者先行革去宗室照平人律問擬斬絞分別實緩其進呈黃冊仍著留宗人府辦理以示區別至被害之人不據實呈訴者按其有無應得罪名分別辦理卽著纂入則例永遠遵行又遠支族長宜歸舊制一條族長有約束教導之責必須諳練事體方於族務有裨嗣後著仍由該族內世職章京與見任職官無論品級秉公揀選帶領引見儼該族見無官員則以別族之員揀選暫署俟本族升有職官再行引見補放其學長缺仍由宗人府照例挑補又盛京宗室營主事調補京缺及告假來京章程一條盛京移居宗室多未諳習事體向由族

學長升補營主事三年期滿卽調京缺未免過優難資歷練轉礙京員升途嗣後著定立年限營主事年滿先掣盛京五部主事上行走年滿果能勝任再行給咨引見仍按其資序調轉其不勝任者卽奏明黜革至移居宗室內告假來京除親喪婚嫁外俱咨明宗人府俟覆准再給路引並定立年限以杜欺詐又變通生計一條據奏直隸省果有田土准告假清理並准向地方官展限盛京有產業者亦准請假等語近時宗室不自檢束者多若聽其紛紛告假名爲調劑生計必致別生事端俟滋事後再由地方官遞回徒形紛擾且宗室例有頂帶該地方官勢不能嚴加約束所奏著無庸議又外任恩賞銀兩分別定限一條外任官員非京職可比國家經費有常豈能將紅白事件槩加恩賞著仍照舊例辦理無庸議增又發遣之人妻女無依者宜加矜恤一條宗室覺羅罪至

發遣妻女無依而又無子可繼者養贍無資殊堪憫惻著照所議分別給予養贍銀米俟罪犯之人赦回卽行裁汰又京察宜加鼓勵一條京察爲激揚大典自應一體加以鼓勵嗣後京察一等之宗室理事官各部院宗室郎中引見圈出後著准其一體復帶引見候朕酌量錄用其副理事官等員仍照舊例辦理如有不稱職之員亦著隨時甄別又宗人府委署主事筆帖式保送倉庫等差一條據奏倉庫等差人多缺少恐滋壅滯且與上年議定保送倉監督章程不符著無庸議又宗室宜廣登進一條宗室自嘉慶年間准令鄉會試並添設六部司員已爲至優極渥至內閣衙門向無宗室額缺今議增宗室中書三年後添設侍讀徒增冗員無裨公事著無庸議其所請變儀衛滿洲漢軍人員內分撥四缺作爲宗室整儀尉扣缺相間輪補並太常寺學習禮部讀祝官缺出

揀選閒散宗室十人一體挑選及分別升補章程事尙可行著照所議辦理又宗室覺羅滋事嚴定懲罰一條此等滋事之人大半爲利而起若因犯至三案輒將本身及父母妻子恩賞銀兩槩不給與犯至六案將每月藍甲銀米盡追入官是令其俯仰無資適足驅之爲惡著無庸議又見審案件宜定限制一條宗人府承辦之案出土則會戶部刑名則會刑部該部本有定限若該衙門另立限期辦理轉不畫一亦著無庸議經此次明定章程寬嚴互用貧寒加之優恤才能亦可疏通該管理宗人府王公等惟當實力稽察認真辦理務使疲頑知儆禮義可興用副朕篤念宗室至意

○癸丑諭軍機大臣等琦善等奏查勘堰圩石工並通盤籌議湖河情形一摺據稱洪湖石工計有九分八月可竣惟石工形如壁立必湖水收至二丈始能刷黃上年湖水積至一丈七尺二寸卽

致失事刻下清水萬難蓄足欲去其病惟有蓄清減黃二法碎石
護隄所以蓄清改移海口所以減黃等語黃運兩河受病已深明
年欲行海運禦壩卽當堅守不放與朕前降諭旨適相符合惟海
運止可暫行河漕必計久遠琦善等能念漕運國帑與淮揚數百
萬生靈不惜心力朕已洞見其微惟碎石護隄工長一萬七千餘
丈需銀六百萬兩之多又須分年辦理不能速收成效其海州所
管之灌河口於王營減壩一帶導黃下注則迤東山海等廳二百
里淤墊梗阻之河道不復經行河口黃水亦必以新海口掣溜迅
急漸次落低卽湖水亦無庸多收可以敵黃濟運如果事無窒礙
自屬救弊良圖惟改移海口築隄挑河需費若干及一切民田場
竈該督等尚未查勘明確著卽會同從長計較權利害之重輕計
保衛之久暫孰費孰省孰難孰易詳慎妥籌據實具奏此係河湖

全局朕原不惜帑金但必須於濟運宣防實有神益而又能經久無弊不徒爲目前之計方爲妥善○是月減免直隸冀州等七州縣積水地額糧緩徵河南安陽等四縣水災新舊額賦

八月丁巳明山以年老命專辦旗務以嵩孚爲刑部尙書調康紹鏞爲湖南巡撫以蘇成額爲廣西巡撫魏元烺爲廣東布政使調張青選爲福建按察使以王庭華爲直隸按察使

○己未

上御經筵○以陳中孚爲漕運總督調成格爲廣東巡撫以武隆阿爲江西巡撫

由內閣學士遷

○庚申召已革刑部尙書韓封來京賞

三品頂帶署刑部右侍郎○壬戌晉封珍嬪赫舍哩氏爲

珍妃

○癸亥諭前據英和奏通籌漕河全局請暫雇海船以分滯運酌折額漕以資治河當交有漕省分各督撫等悉心議奏嗣據各督撫等詳晰籌議安徽江西湖廣離海較遠浙江乍浦甯波海口或

不能停泊或盤剝費鉅惟江蘇上海商船據琦善等奏可以暫行
海運已有旨交議籌辦矣其折色一節據程含章奏窒礙難行請
仍收本色琦善李鴻賓陶澍楊懋恬嵩孚等均以爲弊賣糞生請
收本色由州縣變價歸工惟成格張師誠因全收折色不便於民
請以本折各半徵收朕以漕糧爲天庾正供徵收本色由來已久
改收折色易滋弊端所有江蘇安徽浙江湖廣折漕一節已降旨
無庸議並將該督撫等變價歸工及本折兼收之議槩予駁斥仍
令江西省再行妥議尙未奏到見當秋穫登場各省將次徵收漕
米喫緊之時若耽延時日不早定議恐不肖官吏藉端影射舞弊
病民所關甚巨著通行曉諭有漕省分各督撫所有應徵漕糧仍
照向例徵收本色毋得藉口折漕致滋擾累並著琦善嚴煥體察
情形明年各省軍船行抵江境應如何渡黃運通自應早爲計及

通盤籌畫據實具奏並咨會各該省督撫妥爲辦理俾不至臨時周章總期無誤開兌日期又能全數抵通方爲妥善○甲子諭軍機大臣等昨有旨令各省有清督撫清糧仍照例徵收本色毋得藉口折漕致滋弊竇本日復據成格奏江西額漕覈計七十萬有奇距河距海均千餘里而遙且地極卑溼若仍徵本色恐來年停運存貯易致微變請全數改徵穀石如明春照常濟運卽飛飭各州縣趕緊礮碾上兌如仍有阻滯責成州縣變價銀錢並解其穀石不及變價者妥爲存貯以待下次礮碾搭運等語漕糧徵收米石由來已久今欲計米徵穀恐不肖官吏以改折爲名藉端浮收勢所不免若謂該省卑溼米石不能存貯試思京通各倉分貯漕米陳陳相因積至數年之久尙不至遽行霉變且徵收穀石屆時始令動碾勢必緩不濟急再州縣多此一番礮碾夫工飯食又將

藉口賠累至所稱銀錢並納必至抑勒紛擾所奏著無庸議該撫仍遵前旨照例徵收本色隨時咨查江南湖河情形如明春照常濟運卽全數開兌啓行儻少有阻滯仍著妥爲存貯以俟下年搭運或米石不堪久貯再行籌議變價解歸司庫聽候動撥不得輕率改易舊章致滋流弊江西省收漕較早該撫見已調任廣東巡撫如接奉諭旨業已起程卽移咨護理巡撫嵩溥遵照辦理可也○丁卯改直隸易州州同爲分駐上陳州同宣化縣雞鳴驛丞爲化稍營巡檢懷安縣萬全驛丞爲柴溝堡巡檢懷來縣土木驛丞爲多倫諾爾廳白岔巡檢青縣流河驛丞爲遷安縣沙河巡檢裁上陳驛丞宣化府司獄○己巳諭軍機大臣等程含章奏臬司王惟詢自縊一案續訪據巡撫署內茶夫沈泳等供稱該臬司自屍場赴院稟見時與該署撫黃鳴傑談論兩人聲氣皆大黃鳴傑拍

案生氣屬實並訊據伊家人方桂等供稱該臬司審訊徐蔡氏婢女時令其比試自縊情狀卽有將來我亦如此之言迨福建件作比試搭死情形該司卽比搭其頸神情恍惚行坐不安該家屬晝夜防範等語王惟詢因特交審辦之案檢訊未得端倪遽爾輕生原非情理所應有惟既據該撫歷次訪訊情形並無偏迫致死根據卽續訪黃鳴傑向該臬司拍案生氣實有其事亦何至偏繫其命是該撫所奏該臬司實由情急心迷所致尙屬可信黃鳴傑見已另案革職著免其再議至徐蔡氏一案該撫自到任以來審訊已三月有餘且已覆行開檢明確何難定讞奏結乃任聽該犯等供詞狡展遷延觀望至數月之久瞻前顧後畏首畏尾實屬不成事體該撫督飭該臬司祁墳速行嚴鞫務得確情卽據實定擬具奏不得再有延宕致干咎戾○己卯諭軍機大臣等本日據程含

章奏要案審出實情將從前推諉相驗及檢驗不實各員分別奏參一摺已明降諭旨將黃兆蕙等分別革職解任扣留交該撫提訊矣德清縣民婦徐蔡氏被徐倪氏勒斃一案懸宕至三年之久該省地方官總未審出實情並大小各員通同一氣牢不可破王惟詢以臬司大員因此自縊殊出情理之外茲據該撫督同臬司祁埏設法嚴訊將案內親切要證獲案審出勒斃實情歷歷如繪俾覆盆之冤得以昭雪查辦甚屬認真可嘉之至此案先據湖州府兩次檢驗該屍兩耳根骨有腫上紅色血暈定爲自縊今據該撫覆驗耳根骨並無傷痕項頸骨後面血暈又爲原檢所無此等緊要部位該委員等從前檢驗何竟如此草率至黃兆蕙於屍親呈報時止係偶爾感冒近在本城自應卽時赴驗乃輒稟府委驗希圖諉卸前任武康縣知縣慶辰率以屍腐爲詞不行相驗致徐

蔡氏屍身屢遭蒸檢均屬玩視人命此等劣員難保無婪贓故出情事該撫接奉此旨卽督同臬司祁墳將全案一千人證不避嫌怨嚴行審訊務令水落石出見雖罪人斯得而從前承審各員尤當逐一嚴究毋稍徇縱以儆官邪而昭炯戒方爲不負委任如解任扣留各員續經訊出得贓情弊有應行革審者該撫卽一面將該員革職一面奏聞務得確情以成信讞備經此次審訊仍有不實不盡之處或經朕別有訪聞則惟該撫及該臬司是問○辛巳諭軍機大臣等琦善等奏覈議明歲新漕盤壩接運及豫籌微山湖蓄水事宜一摺本年盤壩接運業經辦有章程江南首二進幫船均未經渡黃歸次明年自應堅守禦黃壩提用江省各幫回空船隻盤壩運通除江甯揚州淮安徐州通州海州等四府二州明歲新漕各歸本幫兌收盤運及各幫內有滿號九運等船應均扣

除外所有首二進並減存在次江北各幫船二千二百三十餘隻
盤運浙江安徽江西湖廣等省漕米足敷應用著該督等臨時通
融辦理前降旨令有漕省分各督撫所有明歲應徵新漕仍照向
例徵收本色並令琦善等體察情形咨會各省妥爲辦理著該督
等仍遵前旨卽知照各省並嚴飭各該省押運員弁沿途加緊催
趲以期及早抵壩迅速盤運並著依重運到壩之先後隨到隨盤
不拘幫次其接運經費除江甯等府州係本幫受兌無庸籌款並
各州縣剝運抵壩水腳等項業經另籌無庸請帑外其餘接運外
省漕糧卽照本年所定水腳等項銀數辦理各軍船並准照例攜
帶土宜免其納稅俾旗丁稍資接濟其各船應給水手往返口糧
由各省旗丁於應領錢糧內付給沿途提溜打鬧亦由各省旗丁
自行開發並將接運幫船每船應給食米一石亦令各省旗丁實

給無庸折價其津貼三分著卽裁減餘俱著照本年軍船接運章程辦理其江省盤壩處所高坂頭禦黃壩順清河吳城七堡等處分別盤剝著均勻牽算以每石二分八釐數計所需帑銀一百萬兩著屆期具奏請旨准其籌款動撥該督等惟當竭力節省總期全漕無誤帑項不至浮糜方爲不負委任至山東微山湖爲南北濟運水樞本年自三月啓壩空重軍船往來絡繹雖前據張井等奏運河水勢充足空重船隻暢行無滯第本年全漕運出東境尙須消耗明歲空重幫船又須往返數次終年宣洩耗水尤多前有旨令張井等隨時收蓄以資利濟茲該督等恐明年收蓄不敷濟運於道光七年全漕所關甚巨自宜爲未雨綢繆之計所有本年首進船隻於抵通交卸後卽在山東臨清閘外衛河一帶停泊守候不必年內回江一俟東省漕糧過竣卽著照挑河計明年接

運新漕六月內自可盤竣趕築湖口大壩並於朱姬莊築作攔壩設法收蓄以補消耗其明年各幫回空亦令先於臨清開外暫行停泊八月後察看湖水已充再行啓開打放南下俾微山湖得資瀦蓄而幫船仍不誤歸次於河漕均有裨益至糧船水手該督等遵照前旨沿途覓派妥幹員弁於船行及停泊守凍臨時稽查彈壓務令沿途安戢勿使滋生事端此爲至要○癸未諭程含章奏要案首犯於取供後在監自縊請將疏縱之典史知縣分別革職解任一摺此案德清縣民婦徐蔡氏被徐倪氏謀勒身死案懸三年之久該省承審各官總未能究出實情經程含章督同臬司邢墳將徐倪氏因與徐蔡氏之夫徐敦誠通姦被徐蔡氏撞見用言譏誚起意謀勒致斃情由究出已據各犯證供認屬實正須嚴行究擬明正刑誅方足以懲淫兇而彰國憲乃犯婦徐倪氏於取供

復自縊身死若非鬆放刑具該犯婦何能自解包頭帕縊斃頭有受賄故縱情弊該管各官並不豫飭刑禁人等嚴加防範玩視公事甚屬可惡非尋常疏縱可比錢塘縣典史劉椿著革職拏問錢塘縣知縣汪仲洋著革職交該撫督同臬司祁墳提齊刑禁人等嚴審究辦加重問擬程合章入聞監臨於此等要犯卽應豫飭該管官小心看守臬司祁墳承審此案且經該撫令其趕緊研審供詞確鑿業已審定屬實尤不應如此疏忽程合章著傳旨申飭祁墳著傳旨嚴行申飭務將全案犯證徹底嚴究並著速行訊結按律定擬具奏如耽延時日再有疏虞惟該撫與該臬司是問恐不能當此重咎也○是月緩徵長蘆屬鹽山青縣二縣嚴鎮海豐二場旱災水災隨課

九月乙酉朔諭那彥成著來京陛見陝甘總督著鄂山暫行署理

陝西巡撫著鄧廷楨暫行護理長齡著調補陝甘總督趙愼畛著
調補雲貴總督閩浙總督員缺著孫爾準補授韓克均著調補福
建巡撫未到任以前著孫爾準兼署雲南巡撫員缺著伊里布於
百日孝滿後前往署理武隆阿著調補山東巡撫江蘇巡撫員缺
著韓文綺補授王楚堂著補授雲南布政使吳光悅著補授湖南
按察使所遺員缺著王鳳生補授長齡趙愼畛韓文綺俱著即赴
新任無庸來京請訓趙愼畛未到任以前雲貴總督著韓克均暫
行兼署韓克均俟趙愼畛到任後將巡撫印務交該督兼署即行
來京請訓再赴新任孫爾準俟韓克均到任後再行來京請訓○
丁亥諭本日句到廣東等省情實各犯內官犯齊濶一起朕詳閱
招冊內該犯以管庫之員膽敢假造文領描摹印信兩次冒領庫
銀數至逾萬作奸舞弊法已極罪無可寬卽予句決以昭炯戒

因思該犯兩次冒領俱係升任藩司蘇明阿任內之事上年定案時因係蘇明阿自行查出稟辦姑照部議降四級留任僅銷去紀錄從寬免其降級今查此案情節甚重蘇明阿兩次失察至冒領一萬二千兩之多非尋常疏忽可比豈可復勝巡撫之任蘇明阿著卽開缺降爲藩司以觀後效各省倉庫錢糧乃藩司專責慎重出入豈容稍有侵虧況係藩司本庫尤不應毫無覺察嗣後務當實力查覈盡心句稽毋使官吏弄巧舞法如再有似此冒領之案必將藩司嚴加懲處決不寬貸○以嵩溥爲貴州巡撫降蘇明阿爲江西布政使○戊子申諭步軍統領督率五營將備勤習技藝○己丑以寶興爲泰甯鎮總兵官轉奕經爲兵部左侍郎以貴慶爲兵部右侍郎由內閣學士遷○壬辰諭琦善等奏請將蘇松常鎮太四府一州應徵道光五年分漕糧全由海運議定運送兌收各章程

一摺海運事宜前據琦善於抵任後飭令藩司賀長齡赴上海查看情形會同妥議嗣該撫陶澍於查勘水利之便亦至上海傳集商船面加曉諭商情頗形踴躍茲據奏見雇有沙船一千餘隻三不像船數十隻計春夏兩次可以運米一百五十餘萬石著照所請將蘇松常鎮太四府一州新漕並緩帶漕糧由海運抵津其所議酌給沙船耗米一款著卽於例給旗丁耗米十八萬餘石內動放所有節省耗米六萬餘石並令隨同起運正耗米石一體運送抵津又海運漕糧無故短少徵變一款著查明如有斫桅鬆艙傷斃人口情事自應奏明免其賠繳並照例優卹若無故短少徵變卽於備帶耗米內補足如再不敷勒令買補以專責成又驗米交米專派大員經理一款著於兌運時派委道府大員等逐一盤驗將米據貯桶黏貼印花交沙船帶津以備欽派驗米大臣查對並

著戶部將沙船到津在東門外交兌限幾日收竣放行卽行議定具奏其需用剝船並著直隸總督飭屬先期多爲雇備隨到隨剝俾沙船不至羈累又沿海水師會哨巡防一款除由該督臨時移行該提鎮將備統巡分巡外著山東直隸各督撫轉飭沿海水師提鎮各按汛地多撥哨船分派將弁兵丁巡防護送並著該督屆期奏派武職大員二人押坐商船赴津以資稽考其商船宜分別獎敘及蘇松等府州軍船酌加調劑二款俱著照所議辦理又另片奏議覆御史熊遇泰條陳海運事宜六款除該督等所設章程已經議及外其海船押運到津經紀人等難免需索刁難請派親信大臣赴津驗收監兌一款尙爲除弊起見著軍機大臣屆時奏請欽派一二員前往此外如有應行隨時酌辦之事該督等務當豫籌詳妥勿致臨時周章有負委任又諭琦善等奏浙江等省滯

漕全數盤運完竣卽飭長運抵通一摺浙江安徽及江廣各幫漕糧前此滯留禦黃壩以南者共一百九十餘萬石經琦善等設法盤運見已全數剝竣長運抵通所辦甚好惟天津北河至通州一帶節節均有古淺新淤轉瞬節交冬令水落歸漕恐致淺阻著琦善卽飭所屬先期多備剝船排列河干守候遇有淺阻相機起剝俾得迅速抵通其銅鉛船隻見亦經琦善等盤運北上如行抵天津一帶應須起剝之處亦著該督隨時飭屬相機辦理以利儲蓄而資鼓鑄○丙申諭向來督撫等奏摺有關地方公務例俱稱臣從前乾隆年間屢奉 聖諭通飭各省自應永遠欽遵近日各省奏摺不能畫一殊屬未協嗣後各省旗員督撫藩臬除請安謝恩外凡奏事具摺俱著一律稱臣以符體制○庚子實授張井河東河道總督○壬寅諭琦善等奏查明盤運滯漕支用經費除

去應行歸墊及賠繳各款覈計實銷並節省銀數一摺本年浙江等省滯漕一百九十餘萬石盤運經費前經孫玉庭等奏請約需銀一百二十餘萬兩先於藩運各庫就近撥用銀一百零二萬兩自琦善抵任後節令總局道員力加撙節將用過各款逐一勾稽覈減統計實銷銀七十八萬七千四百八十餘兩較原請銀一百二十萬兩之數節省銀四十餘萬兩辦理實屬認真著准其如數報部覈銷此外有剝船坐口口糧前經部議不准開銷一款據該督等查明民剝船隻皆以逐日攬載爲生令其守候停泊不能不計口授食自係實在情形著照所請將此項口糧准其一併開銷其由總局墊支剝船運米過關首進軍船修舨並折給舵水食米等費共銀七萬三千七百六十餘兩著於浙江等省糧道扣解歸款至一切例外浮多等項共銀十一萬七千六百七十餘兩自不

應准其報銷前經戶部議奏支用盤運經費內如有例不准銷各款責令孫玉庭賠繳七成顏檢賠繳三成降旨交琦善查明據實具奏該督另片奏稱孫玉庭係督催之員顏檢有專司之責魏元煜嚴煥同時共事總局道員綜司出納未能覈實計議均屬咎無可辭議請分別著賠著照所請將應賠銀兩在孫玉庭名下著賠三成銀三萬五千三百兩零顏檢名下著賠二成銀二萬三千五百餘兩魏元煜嚴煥名下合賠三成計各應賠銀一萬七千六百餘兩總局道員福兆沈學廉梁章鉅及前護理淮海道之同知萬承紀四員名下合賠二成計各應賠銀五千八百餘兩此項分賠銀兩非尋常賠項可比著勒限二年責令孫玉庭等及魏元煜之子魏亨遠依限全數完繳如敢延宕不交著琦善即嚴參治罪決不寬貸其豫省封雇民船及東省接運軍民船隻所用經費著各

督撫自行覈實報銷○癸卯諭朕恭閱 皇祖高宗純皇帝實錄

內載乾隆三十五年五月奉 上諭外省督撫每遇應行審擬之

案動輒委員查訊最爲惡習其在尋常案件或可循用審轉成規
若事關重大及案涉疑難亦復假手下僚則瞻徇蒙蔽顛預了事
諸弊皆所不免獄情何由得明督撫爲朕簡任大臣其才識自勝
於僚屬而心亦公平無所顧忌斷獄或易得實情何憚而不躬親
鞠問豈其自願謂不若有司之明習吏事乎抑狃於外任養高積
習全不問事理輕重惟恐親身識牘之損失威重乎朕日理萬幾
事無巨細莫不詳爲披省日召諸臣講論施行儻如該督撫等之
見將一切付諸部院覈覆竟可不親身綜攬耶嗣後督撫於應行
提審緊要案件務須率同司道等親行研審毋得仍沿委員陋習
自取咎戾著爲例等因欽此仰見 聖訓煌煌矜慎庶獄至意朕

簡用督撫昇以封疆重任凡遇特旨交審之案卽與欽差無異其民閒上控案件亦應視案之輕重提省親審不得一槩假手屬官予以消弭地步況上司徇庇屬員同官相爲隱飾積習相沿牢不可破若於重大之案發交該府州自爲審理或委員代爲鞠訊無論該管府州心存回護必不肯自翻前案卽委員中能不存官官相護之見者得有幾人以致民隱未白枝節更生一經特派大員查辦或解交刑部審訊無不真情畢露昭雪平反卽如上年山西省閻思虎近日浙江省徐倪氏二案彼時該撫邱樹棠黃鳴傑若能及早親提究審何至案牘久懸被不肖之屬員昏墨欺蒙幾致覆盆不能昭雪乎著再申諭各督撫嗣後凡有事關命盜重情及控涉官吏贓私劣蹟者無論特交及上控之案均應親提人證率同司道詳加研鞫速行擬結庶足杜濇張而清訟牘儻此次申諭

之後並不悞遵辦理經朕查出或被科道糾參必將該督撫從重懲處不稍寬貸○庚戌申定世職人員犯贓革職子孫不准承襲例○改直隸順德府同知爲水利鹽捕同知保定府通判爲兼河鹽捕通判○壬子諭琦善等奏接運帶漕全數挽出江境一摺本年接運浙江江廣等幫漕糧軍餉各船見經琦善等飭屬趕緊督催業於本月十九日俱已挽出江境釐辦實爲迅速琦善穆彰阿嚴煥俱著交部議敘並著山東巡撫直隸總督嚴飭沿途員弁無分晝夜加緊趲行務使全數抵通毋許片刻泊延致滋貽誤○諭軍機大臣等琦善奏查勘灌河海口內外河窄灘高難以率行改移仍不如河隄拋護碎石坦坡一摺前據該督等奏王營減壩以北至灌河口可以改導黃河入海以期黃水掣溜迅疾漸次落低旋經委員查得灌河口外之水不如口內之深必須親往確勘茲

據勘明該處海灘高仰導河必爲頂阻掣溜難期迅疾且口內河形窄狹膠淤不能刷深一經下游頂阻勢必泛濫四出是較見行海口轉無把握未便率行更張所見甚是著無庸置議其所稱於八灘以下兩岸隄盡處接築長隄以束散漫之流復於八灘以上河身過灣處取直挑河以成吸川之勢並將河底墊高之兩岸隄工再爲增培高厚以禦盛漲庶淤墊之處漸次刷深著照所議妥爲辦理至所稱湖隄拋築碎石坦坡可漸收蓄清刷黃之益需費甚鉅不能不分年辦理等語碎石坦坡如果於湖隄石工實有裨益而又能經久無弊朕原不惜帑金興辦但此項工程有謂護隄於河工有益者亦有議稱將來塌卸恐有流弊者究竟可辦與否著該督等再行詳加查勘通籌河湖全局計出萬全總期有裨河務不可輕率定議致滋流弊是爲至要○諭慶祥奏接據喀什噶

爾咨調官兵揀派前往並續准報稱官兵出卡被圍巴彥巴圖及官兵等同時陣歿各一摺逆夷張格爾屢在卡外滋擾本年夏間復逞詐約降事洩遠竄今又勾結布魯特汰劣克拜巴哈什等潛至卡外劫掠覽奏深堪痛恨慶祥接據來咨卽派令穆克登布帶兵一千名先行馳赴聽候調遣並豫備兵一千名俟續接知會令烏凌阿隨後帶領前往所辦甚是本日亦據永芹同時馳報雖據奏稱兵氛已過卡內安靜如常逆匪分投遠竄此次永芹等輕舉妄動致損兵威陣傷大員必須痛加勦戮以彰天討惟值節交冬令卡外冰雪在地勢難進兵該將軍見已派員馳往偵探如須親往督辦卽著迅速趨赴前經降旨令慶祥來京陛見見有此事卽德英阿到彼須會同商辦著暫緩前來候旨遵行穆克登布既帶兵駐紮該處烏凌阿亦隨後帶兵前往如有應須熟諳帶兵人員

之處或就近調往或由京簡派卽著籌畫周妥迅速具奏或此時暫緩進兵如有由京派往之員令其何時前往亦卽詳悉奏聞見將舒爾哈善調補喀什噶爾幫辦大臣其員缺暫令穆克登布署理想舒爾哈善接奉諭旨卽迅速馳赴新任穆克登布交卸後仍令在彼帶兵駐紮嚴密防範可也○是月賑陝西綏德等四州縣雹災並緩徵額賦緩徵山東濮州等四十四州縣德州等四衛旱災蠲災額賦逋款展緩山東濟南等十一府州縣逋賦蠲緩直隸開州等十五州縣旱災雹災新舊額賦

冬十月甲寅朔諭軍機大臣等據張井奏熟籌河工久遠大局請敕講求疏導良規一摺治河之道疏濬與修防並重近日河底墊高爲患日甚其弊皆由於有防無治該河督所奏歷年以來當伏秋大汛司河各官率皆倉皇奔走搶救不遑及至水落霜清則以

見在可保無虞而不復再求疏刷河身之策漸至河底日高清水不能暢出隄身遞增城郭居民盡在河底之下惟仗歲請金錢將黃河擡於至高之處所言切中時弊每年東河南河歲請修防經費數百萬金在國家保衛民生原不靳惜帑金惟似此年年增培隄堰河身愈墊愈高勢將何所底止前此琦善等因河工敗壞曾有改移海口以減黃拋護碎石坦坡以蓄清二議昨據奏稱前赴灌河一帶勘明灌河口海灘高仰導河必爲頂阻掣溜難期迅疾口內河形窄狹膠淤不能刷深一經下游頂阻勢必泛溢四出較見行之海口轉無把握且稽考成案康熙年間屢改屢決嘉慶年間屢議未就自不可輕易更張卽碎石坦坡原爲保護湖隄之計然亦有議及流弊者亦不可不從長計議見據張井奏陳或逢灣取直或設法疏濬或復新輔濬船成法或築作對頭壩工在張井

嚴煥身任河督河務是其專責琦善程祖洛兼管河工亦責無旁貸著卽會同籌議或於道將應營員弁內之諳習河務者將海口如何可以大暢河底如何可以刷深悉心講求總期遂就下之性復舊日成規於河工大局計深慮遠籌畫萬全以冀永慶平成勿狃於目前積習方爲不負委任也○允吳榮光解職省親以富尼揚阿爲貴州布政使源博爲湖北按察使由浙江杭嘉湖道遷○己未追祀元臣拜住於陝西大荔縣忠義祠○庚午諭琦善等奏堰圩石工完竣請酌添保固年限一摺高堰山圩兩廳石工上年被風掣塌當經飭派監催各員分段估修見已依限完竣據該督等查明工程尙無遲誤惟新砌石料內多畝斜空隙僅恃灰漿錠鑄難資抵禦其從前舊工尤多偷減等語洪湖石工原以蓄水濟運保衛民生前此在事工員辦理草率誤運殃民殊堪痛恨此次堰圩石工

長至一萬一千餘丈用銀至九十餘萬兩之多非尋常工程可比
若僅照例保固將來工員得以置身事外糜帑滋多著於例限三
年外再加保固一年如限內稍有掣塌卽令原辦之員賠修示懲
將來承辦坦坡各員亦著照此辦理俾知儆畏至高堰十三堡山
盱息浪庵兩處補還石工著卽發銀購料興修嚴飭工員認真趕
辦又另片奏長隄新舊石工共掣卸十一段信壩埽戽亦掣通過
水見經該道將督飭廳營各員堵合穩固該處壩工甫經辦竣何
至一遇風暴卽有坍塌所有原作埽戽銀兩卽覈明分別賠修見
任山盱通判孫厚坤山盱營守備尹漣著卽行撤任以爲修防不
慎者戒○諭軍機大臣等朕因翰林院侍講學士潘錫恩平日尙
能留心水利上年條陳海運河工事宜敷奏頗爲明晰本日已降
旨將該員發往江蘇以道員用矣該員到省後著琦善留心察看

如果熟諳河務卽於河工道缺中酌量奏補如不勝任亦著據實奏聞不得因係特旨命往人員稍存遷就○以舒明阿爲杭州將軍奎照兼署工部左侍郎由禮左署○以運河挑竣准孫玉庭顏檢回籍○丁丑 上幸 皇長子奕緯所○庚辰諭京旗戶口前往雙城堡屯田見屆道光六年移駐之期經戶部查明願往者共一百八十九戶較之道光四五年倍形踊躍來年前往者自必更多若照原議章程每年以二百戶爲率稍逾奏額卽令裁撤該閒散等未免向隅且上兩屆每年僅數十戶縱將來人數稍多該處地畝房閒亦可截長補短嗣後著不必拘定二百戶之數該將軍富俊卽加意籌畫妥爲經理以期旗人生計日臻饒裕其各旗咨報戶口自明年爲始著於正月以後卽將願往者陸續呈報截至六月底爲止該部按照人數多寡先行知照吉林將軍豫爲料理至七

月以後報出戶口如人數不多仍歸入該年冊內備人數過多卽另入下年移駐俾京外俱得從容布置○諭軍機大臣等慶祥奏查訪喀什噶爾地方安靜賊匪遠竄情形一摺據稱見在偵報賊匪竄至碩拉地方約有五六百里若官兵勢大卽欲竄往稻罕見在卡倫外已有冰雪似不如謹飭邊備以逸待勞就前派去一千官兵卽在卡倫嚴堵伊犁見有哈薩克邊界應辦之事喀什噶爾業已安靜無庸急往後二起未進官兵應暫停止等語所奏雖是但未盡之處甚多慶祥身膺重寄受皇考特達之恩在伊犁莅任有年該逆張格爾屢次犯我卡倫傷我官兵甚至傷我二品大員同時陣歿者以百計該將軍義切同仇當如何痛心疾首矢滅此朝食之念乃旣不能先事防範事後又一籌莫展所奏無非空言搪塞了局派去之一千官兵豈能長川在彼防堵所謂以逸待

勞者更不成話窮追盡戮朕亦知其不可然坐令逆夷往來自若而我官兵時有傷損以我堂堂大清屢挫銳於小醜成何事體卽云見屆冬令大雪封山難保來春冰融該逆夷不復萌窺伺見在該逆夷已有一二千人若日益增多竟至直犯卡倫又將何以禦之巴彥巴圖孤軍深入全歸陷歿彼時卽應將慶祥交部議處永芹革職治罪伊等轉可置身事外故姑從寬貸俾得勉贖前愆見已明降諭旨令長齡署伊犁將軍慶祥俟長齡到任後迅速前往喀什噶爾會同永芹相機妥辦責成該將軍等務將張格爾及汰劣克拜巴哈什二逆設法擒捕盡法懲治以張國威而靖邊圉朕將拭目以待然於盡心籌畫之中尤當加以慎重慶祥等亦不可因有此嚴旨遂希圖邀功冒昧輕進致有意外之虞若老師糜餉損威辱國朕惟執法重治慶祥等之罪決不寬宥○以長齡署伊

率將軍楊遇春署陝甘總督由國原○辛巳召蔣攸銑來京以那

彥成爲直隸總督

前任陝甘總督

○召蔡炯來京調源溥爲甘肅按察使

以岳祥爲湖北按察使

由山西歸

○是月賑陝西榆林等三縣雹

災緩徵榆林等四縣雹災河南饑封等十八應縣歉收山東高唐

等八州縣旱災蠲災浙江臨海縣旱災風災額賦江蘇高郵等十

三州縣水災旱災安徽壽州等二十州縣水災旱災新舊額賦留

古塔旱災額賦十分之五甘肅宜禾縣遭糧

十一月丙戌諭本年堰圩石工完竣經琦善等奏准於例限三年

外再加保固一年並將新工掣卸之處責令原辦之員賠修該管

員弁撤任示儆茲據工部查明本年七月內嚴烜奏稱已完石工

勘驗實係照估安砌灰漿飽滿見據琦善等奏新砌石料外雖平

光內多敲斜空隙多有碎石填砌灰漿灌抵究不足以資抵禦並

新工已有掣卸顯與嚴煥前奏不符嚴煥既不於會奏時據實檢舉琦善業經查出工料偷減亦並未指名嚴參殊屬含混了事又據該督等奏稱見在議辦碎石坦坡計至四年限滿已有碎石拋護隄根隄工似可穩固是前辦堰盱隄工全無實在把握碎石坦坡並未定有章程剋期辦理設遇意外風浪之虞何所恃以爲固至所請加保固限一年亦係嘉慶十二年奏明堰盱石工成案並非例外新添意似從嚴實豫爲工員諉卸地步此項石工於河槽民生關係緊要本年用銀至九十餘萬兩之多若似此潦草完工蒙混陳奏豈不大負委任將來若有掣卸誰執其咎著交琦善卽將此項工程欹斜空隙以及多用碎石填砌僅恃灰漿灌泥之處確切查明係何工段落何員承修嚴參示懲並如何設法補救以杜後患妥議具奏毋徒爲敷衍目前之計至報銷到部時並著將

用何項條石詳細造報由該部分別准駁以歸覈實○以鍾昌爲

內閣學士兼禮部侍郎銜

由事遷

○丁亥李滢以病免以嚴如煜爲

貴州按察使

由陝西陝安道遷

○王辰以暹羅國貢船漂沒詔免進土貢

封世子鄭福爲暹羅國王○理藩院尙書穆彰阿丁憂賞銀三百

兩治喪○庚子命大學士蔣攸銑在軍機大臣上行走○癸卯命

慶祥總辦喀什噶爾軍務○乙巳 上詣 大高殿祈雪○丁未

雪○諭軍機大臣等琦善等奏通籌河湖全局議築碎石坦坡並

臚陳利弊請分年辦理一摺朕詳加披閱高堰隄工不固清水未

能蓄蓄該督等議築坦坡護隄原係補偏救弊之策惟石工段落

縣長計非五六年不能竣事此五六年中清水不能蓄足敵黃禦

黃壩仍難啓放運道依舊難通且計通工之需與歲修碎石之費

爲數不貲若卽以此項工費將椿朽根鬆隄工開段拆修完固或

可不築坦坡足資抵禦豈不較碎石爲一勞永逸之計並可免滋
流弊抑或將隄工修築完固後擇要拋護碎石更爲得力均須悉
心籌畫計出萬全見據該督等奏稱舊工之草率較新工爲尤甚
是新工舊工皆不足恃卽拋護碎石而隄根不固又豈能當風浪
之掣激設經久毫無實效豈不以數百萬之帑金輕付洪流而貽
害更非淺鮮著該督等再行詳加履勘將舊工之草率難資擊載
者共有若干其從前靳輔所修原隄尙存若干是否可能修築完
固琦善等務當不避嫌怨無稍回護逐一查明據實由驛具奏其
應如何定議之處俟奏到時再降諭旨又諭琦善等奏會議治河
大局請修復毛城鋪舊壩及王營減壩以期減黃掣淤等語近來
河底日漸淤高清水不能暢出該督等於補偏救弊之中力求萬
全無弊之法所奏逢灣取直束水攻沙可收遠效難冀近功自屬

實在情形惟毛城鋪舊壩雖有分洩黃流增益湖漕之利從前黎世序在任時曾經勘明該壩衝廢不能修復於十八里屯中間創平山頂改爲天然滾壩以虎山腰作爲重門擊托奏明動帑興修該處壩工亦在徐城以上距毛城鋪不遠如分洩黃流之力與毛城鋪不相上下自較修復毛城鋪舊壩爲省便琦善等見已委員前往著卽一併履勘是否必須於十八里屯之外再修復毛城鋪舊壩更爲得力至王營減壩距清口不遠亦可減黃掣淤自不妨將應修土埽工程豫爲籌辦該督等務當詳議周妥奏明辦理總期計出萬全治圖久遠俾河治漕行勉副委任○己酉諭王鼎等奏審訊徐倪氏等於犯案後向經手官吏行賄舞弊分別定擬一摺此案已革德清縣知縣黃兆蕙於蔡鴻鵠案時近在同城借病推諉玩視人命以致屍骨疊遭蒸檢幾成冤獄又於和息時得受

賄銀一百圓實屬貪劣不職著從重發往黑龍江充當苦差已革
歸安縣知縣馬伯樂雖訊無婪贓情事惟首先承審既未究出實
情又失察伊兄馬汝霖及家人刑件等詐索多贖復檢驗不實致
釀巨案且於該撫審訊時謂爲非刑鍛鍊向副考官投遞書信希
圖挾制殊屬刁健著從重發往新疆效力贖罪已革湖州府知府
方士淦始則任德清縣藉病推諉繼復聽武康縣以屍腐爲詞不
如法相驗種種習率無方形同木偶迨委令督同開檢又未能檢
出傷痕實屬昏愎著發往軍臺效力贖罪已革巡檢馬汝霖於家
人李明求託時得受洋錢三百圓始而不肯成招繼復自行殘傷
抗違不到情殊刁詐所擬發附近充軍尙覺過輕著改爲邊遠充
軍已革錢塘縣典史劉椿於犯婦徐倪氏在監自盡雖訊無得賄
故縱情弊惟不加意防範致逞兇首惡倖逃顯戮非尋常疏忽可

比所擬杖六十徒一年尙覺過輕著改爲杖八十徒二年黃兆蕙
家人崔湧爲伊本官過付和息贓銀又自得洋銀二十圓僅擬杖
責亦覺輕縱著改爲杖八十徒二年署杭州府知府張允垂失防
擬徒人犯在獄自盡著交部照例議處所有此案不能審出實情
並失察之歷任巡撫臬司著查取職名交部議處黃鳴傑著卽回
籍聽候部議其程含章前奏審擬謀殺徐蔡氏各犯及仵作訟師
賄屬各情分別定擬見經王鼎詳加查覈情罪相符所有謀殺加
功原議斬決之秋香一犯著卽行處斬徐敦誠訊無同謀加功情
事著照擬杖一百流三千里已革府經歷費文燾以在籍職官於
謀命重案代爲主訟過付作詞捏控情殊可惡費文燾著發雲貴
兩廣極邊煙瘴充軍餘俱照該撫前奏所擬完結至候補知縣党
金衡委提要證桂香辦理妥速復隨同晝夜熬審不辭勞瘁著照

該撫所請准其儘先補用以示鼓勵○奪永芹職召來京○壬子永芹病故以慶祥爲喀什噶爾參贊大臣實授長齡伊犁將軍○是月賑甘肅岷州等六州縣水災霍災緩徵岷州等八州縣江西南昌新建二縣水災額賦江蘇太倉等三十州廳縣衛連賦

十二月甲寅諭近來內外滿漢諸臣能實心實力不避嫌怨爲國宣勤者固不乏人而因循觀望遇事浮沈者亦復不少卽如山西閻思虎一案非特旨調京發部覆訊幾致烈女含冤淫徒漏網又有浙江德清縣之案經年累月未成信讞若非特簡撫臣臬司加以嚴敕頻頒復命軍機大臣王鼎會同覆勘焉能罪人斯得冤案平反凡此皆因官官相護罔顧天良罔盡心力止知竊祿肥家置民瘼於弗問言念及此憤懣何堪朕深愧一時未能盡除此等閹茸貪劣之員朕之過也甚則有若孫玉庭魏元煜顏檢張文恪受

國厚恩身膺重寄或摸稜取巧或依附和同誤國殃民深孤職守雖皆按律懲治自咎無知人之明此皆外任養尊處優不肯殫盡心力之惡習至於京中各部院衙門向來承辦公務尙屬遵例認真乃日內禮部議奏浙江監生徐晉鈔錄舊文中式後自行檢舉請照該撫原奏將該生註銷舉人仍留監生等語已有旨諭矣此事當巡撫程含章具奏時朕已覺其失於寬逮交部議而部臣並以錄舊若果偶膺疾病心神不清不能寫作原不出乎情理但該革生既能鈔襲舊文復加竄改而二三場經策文理亦稱清順此非重大之疾已可槩見在部臣則當執法而行議以斥革並將該省巡撫附參方爲正辦不思及此反爲一人委曲周旋又開一條門路且因病錄舊一語出於何典更不成話矣再科場條例穆克

登額舒英容或不知若汪廷珍韓鼎晉奎照劉彬士均係科甲出身何得諉爲不知故爲此有意從輕以邀名譽之舉耶且爲大臣者務思大者遠者不可因一人增添例文一事留遺弊端多制之譏豈不問乎總之不能持公秉正動輒畏首畏尾自顧之心重竭誠之念輕朕爲天下主豈不欲人人而悅之試問能乎可乎矧士爲四民之首如有不遵法度者必當按律懲創不容末減此非薄待士子正所以端士習厚風俗久遠之謀也嗣後內外滿漢大小諸官務要共矢丹忱佐予圖治不可染玩愒之習不可存推諉見好之心庶至於大法小廉綱舉目張是予之至願也毋忽所有此次率行具奏之該省巡撫程含章著交部察議不行按例議駁之禮部尙書穆克登額侍郎舒英著嚴行申飭尙書汪廷珍侍郎韓鼎晉奎照劉彬士俱著交部察議○以浙江海甯等十一州縣丞

苗被風准和稷並納○丙辰恭修

仁宗睿皇帝本紀成○諭各

督撫飭屬速驗命案毋任意遲延○辛酉增設蒼霞後右二門章

京各二○乙丑

上詣

大高殿祈雪○

諭慶祥奏查訪喀什噶

爾官兵出卡失利實在情形一摺前據永芹奏巴彥巴圖帶兵出
卡剿賊被害情形朕卽疑其所奏未盡確實當降旨交慶祥密加
查訪茲據查訪張格爾於七月間至薩雅克部落居住跟隨僅十
八人經該阿奇木邁瑪薩依特帶同貿易回子及小布嚕特等稟
報永芹卽令巴彥巴圖帶兵二百名以查卡倫爲名前往搜拏行
至都爾伯津地方將汰劣克及伊屬下人等之家口男女大小百
餘名全行殺害詢知張格爾已於前五六日潛匿拜巴哈什處汰
劣克帶同夙布嚕特追圍官兵力戰一夜剿殺布嚕特百餘人官
兵多有陣亡巴彥巴圖旋因臂中槍傷自刎死是張格爾窮蹙餘

生甚好機會轉致措置乖方重損聲威實堪痛恨永芹身為參贊
既已調度失宜又復奏事不實若使其身尚在必當革職拏問按
軍法治罪前已降旨將永芹革去都統不足蔽辜其子縣煥縣星
俱著革去輔國將軍二等侍衛降為奉恩將軍永不准挑選別項
差使以爲貽誤軍務者戒巴彥巴圖輕率出卡妄殺多人轉致逆
夷張格爾先期竄匿罪有應得姑念其被圍受傷事急捐軀究係
歿於王事尙堪憐憫著加恩仍留都統銜及加賞世職其餘應得
卹典著槩行停止○諭軍機大臣等慶祥奏見查張格爾在托古
斯托羅地方阿坦台家居住汰劣克拜巴喀什瑪達特等俱附近
居住霍卓巴爾迪帶二百餘人往霍罕去已諭令邁瑪薩依特查
探進兵路徑並令曉諭效順之布噶特設法擒獻藉兵威使之合
力懸重賞使之樂從各節籌畫悉合機宜自當如此辦理惟賞項

所需將來若能將首逆張格爾縛獻或將汰劣克拜巴哈什瑪達
特等縛獻俱應准其作正開銷其所奏阿奇木邁瑪薩依特尙能
撫馭回眾辦事亦能認真張格爾於七月閒至薩雅克部落汰劣
克處居住跟隨僅十八人係邁瑪薩依特帶同貿易回子及小布
嚕特等稟報是該阿奇木之盡心效力似屬可信但所稟報張格
爾跟隨僅十八人尙須詳查確實朕聞巴彥巴圖之輕出卡倫係
有以張格爾此次窮蹙前來投誠爲言者永芹始商令巴彥巴圖
帶兵前往以致墮其奸計是當時造言之人卽係內外潛通消息
之奸細必應查訪明確密拏懲治著慶祥於到喀什噶爾後再行
密加訪查究係何人倡爲此說據實奏明辦理勿得稍涉顛預○
丙寅賜高年頂帶三萬七千三百四十五人○命刑部將緩決三
次以上人犯減等發落○戊辰定查城都統副都統三年更代例

○丁丑容海因病解任以周錫章爲廣東按察使

由浙江鹽運使遷

○戊

寅以福建歉收准暫弛海禁販運浙米○是歲朝鮮琉球暹羅越南來貢○會計天下民穀數各省通共大小男婦三萬七千九百八十八萬五千三百四十名口各省通共存倉米穀三千二百六十一萬一百六十石三斗九升六合六勺

東華續錄

道光十三年

臣王先謙敬編

臣周綱蕃恭校

道光六年丙戌春正月甲申以籌辦雙城堡屯田妥協加將軍富俊太子太保○召姚祖同來京調嚴如煜爲陝西按察使以何金爲貴州按察使

由貴西道遷

○乙酉諭軍機大臣等慶祥奏接常德札

覆須於二月進剿卽將前派後起官兵一千名派領隊大臣烏凌阿管帶啓行計二月初間卽已到齊等語慶祥前此所奏調度官兵並查探逆夷蹤迹鎮以兵威懸以重賞設法將該逆夷等縛獻種種籌畫機宜尙不爲無見何以接據常德札覆二月進剿之言率令烏凌阿將後起官兵管帶前往試思該逆夷竄匿各布嚕特地方並無一定巢穴卽使二月間大兵雲集不但張格爾無從擒

捕卽汰劣克等亦游牧無定卡倫外皆外夷部落路徑叢雜從何進兵剿捕慶祥熟悉彼處情形乃因常德之言轉致游牧無據冒昧撥兵前往著傳旨嚴行申飭常德前因擅發急遞交部議處俟奏上時再降諭旨此時計算長齡英惠必有一人行抵伊犁慶祥仍俟伊二人無論何人先到交卸後再馳往喀什噶爾相度情形遵照節次所降諭旨詳籌妥辦其後起派往官兵該參贊到彼察看如必須分派應用卽酌量暫留該處若無須如許兵力卽陸續撤回歸伍伊犁地方緊要烏凌阿等亦有本任應辦事宜如不須二人在彼著於穆克登布烏凌阿二人內酌留一人聽候調遣其餘一員卽令管帶撤回官兵仍回本任慶祥總當堅持定見盡心籌畫用副委任不可輕聽人言致爲搖惑也○甲午調劉彬士爲刑部右侍郎史致儼爲禮部右侍郎○丁未諭軍機大臣等長齡

奏稱此次慶祥所謂伊犁烏嚕木齊及各路換防官兵共有四五千名均係未經軍旅之師帶兵又無得力之員不識紀律如必須進兵尙須妥協斟酌不可輕舉妄動張格爾生長外夷路徑最熟我兵不識路徑又無鄉導且出卡尙係布嚕特再入卽是霍罕地方官兵到處不能不擾及外夷儻若激成事端遂致復啓邊釁該逆見在托古斯托羅等處游奕之說尙係九十月閒探聽之言將來我兵出卡定必聞風遠竄否則又令我兵深入另設詭計我兵追捕愈深一切糧餉軍火文報軍臺並無諳熟官兵經理該逆一日不獲官兵一日難撤喀什噶爾又無存貯糧餉接濟必致進退爲難等語逆裔張格爾罪犯稽誅隱匿各布嚕特地方勾結煽惑必須設法擒獲盡法懲治以張國威第卡倫外路徑叢雜我兵不宜深入慶祥節次所奏陳兵宜威懸賞購綖各事種種尙合機宜

長齡因在途次聞調派各路官兵以爲必欲進兵勦辦未悉該參贊籌畫事宜與節次所降諭旨故有此奏並據奏稱見已詳晰札致慶祥該參贊接信後亦必將見籌機宜札商辦理慶祥到喀什噶爾後惟當體察情形堅持定見相機辦理如能得以夷制夷之力將張格爾及巴布頂汰劣克等諸逆悉數殲擒或縛獻數犯固可申國法而靖邊圉如一時不能擒獲藏事慶祥自必籌畫善後之計不至曠日持久老師糜餉進退兩難該參贊務將一切情形通盤熟計悉臻妥善不負委任朕亦不爲遙制也○壬子岳祥以病免調興科爲湖北按察使以吉恒署四川按察使前任四川按察使○是月展賑奉天錦州中前所等處旗戶水災給江蘇沛縣災民口糧貸奉天甯遠州旗民河南鄆陵等七縣甘肅岷州等十二州縣山西襄垣縣直隸寶坻等三縣水災旱災雹災籽種口糧倉穀緩

徵山東濮州等三十三州縣場衛錢漕倉穀

二月癸丑朔費丙章丁憂以邱鳴泰爲湖北布政使戴聰爲山西

按察使

曲安祿廬道遷

○丙辰調博啓圖爲戶部左侍郎以阿爾邦阿

爲工部左侍郎

曲總管內務府大臣遷

○庚申

上御經筵

○諭軍機大臣

等琦善奏洪湖石工未能開段拆修請擇要試辦坦坡護隄蓄水一摺高堰爲淮揚保障從前工程本屬鞏固百餘年來從無大患卽閒有掣卸亦不至如前年之甚雖因風浪過大蓄清過多實由近年總未認真修理任其塌卸剝落以致爲患甚鉅嚴烜承張文浩失事之後經朕特簡南河卽應徹底勘明認真興辦乃因循疲玩一載有餘毫無把握所辦石工草率了事仍稱灰漿未老不能蓄清直至琦善到彼嚴烜始由清江閱視河工見河身淤高所辦堰工全不足恃無計可施堅主碎石坦坡之議分作五年拋成每

年拋石三十餘萬方禦壩業經堵閉兩年是辦成已須七年之久
朕卽覺其需時糜帑當降旨令琦善等另行妥議茲據琦善奏通
石湖船每年可運碎石二十萬九千一百六十方是運石之船止
有此數斷不能與前奏每年三十餘萬方之數相符計需八年方
能辦成試思禦黃壩兩年不開河漕俱已萬分掣肘豈能遲之又
久至十年之後耶況此數年中河身無清水刷滌勢必黃水愈高
又將何所措手在嚴烜之意自以數年之內經風掣場又可諉卸
於碎石未經全拋以掩飾其前此辦理不善之咎且碎石坦坡需
時甚長所費尤鉅若年年拋護有場卽拋糜帑誤工伊於胡底是
碎石坦坡斷不可行所請試辦一年著無庸議琦善經朕簡任兩
江總督無可推諉此事朕惟責成該督一人前據嚴烜奏山海安
阜四廳境內河身坐灣如關家灘孟家灘九套何家社兜灣過甚

擇要酌估挑切引河一二道以備汎漲啓放掣溜成河計估需銀二十萬兩並接築長隄以備大汎又據陳中孚奏請於高堰後三隄舊址展築二隄期復舊清舊制近年河患不僅在清水之短絀而在河底之擡高欲期河底刷深仍不外束水攻沙逢灣取直之法朕聞從前黎世序在徐州辦過引河切灘著有成績自應趕緊辦理切灘引河以收速效辦竣後再籌議接築高堰二隄以期蓄清敵黃該督卽督同淮揚道潘錫恩及河員中結實可靠者次第興辦總期本年回空船隻無誤遄行明歲重運北來可復舊規方爲妥協至河工劣員但知借工侵蝕全不以公事爲重主築隄不挑河之說糜餉誤工其言斷不可聽勉之慎之又該督奏議覆那彥成奏運通漕糧改用長剝格礙難行一摺那彥成奏到時朕卽覺其說不可行茲據該督奏熬壩挑河均有所礙長途剝載微變

堪虞以及經費不充丁情苦累所議俱是著無庸議但該督既知長剝難行海運又不可久是禦壩斷不能不開總當以疏河蓄清爲己任用正人聽正言矢虛衷而持定見築壩衛清切灘減黃黃水低一寸清水卽高一寸俾禦壩可以開放河湖俱復舊規方爲不負委任○辛酉錢寶甯以病免以王庭華爲山西布政使戴宗沅爲直隸按察使由江南河運○壬戌諭琦善奏海運漕糧儘船收兌見到商船九百餘隻足運米八十萬石所有兌竣船隻先開赴十漕候風初運沙剝到津卸米後前往奉天買豆催令南歸等語販豆係該商船常年本業且海船利於壓重不能駛放空船自應准其照常往販惟尙有二次兌運必應迅速南下著奉天府尹飭各該地方官俟商船到彼卽令置貨開行無得勒指並飛咨經過直隸山東各省轉飭沿途海口催令南歸勿任逗留貽誤○癸亥

諭軍機大臣等據陶澍奏海船初運米石見已儘船儘兌陸續開
出十漉地方候過二月初八日風信開行若遇順風旬餘即可抵
津等語海船乘風開行抵津迅速必須將應用剎船及一切事宜
豫爲布置周妥著那彥成卽飭陶樸鄭祖琛等遵照節次奏定章
程卽日籌備妥協以便海船隨到隨剎勿稍遲滯○調邱鳴泰爲
安徽布政使徐承恩爲湖北布政使○甲子書銘休致以惠端爲
盛京兵部侍郎由左副都御史遷○丁卯諭軍機大臣等據琦善奏稱見
在黃水已長至三丈有餘兩岸隄工高出水面數尺設伏秋二汛
水漲卽可高與隄平目前救急之計自以增培大隄接築海隄較
挑切工程爲急等語黃河南過凌汛而水已長至三丈有餘增培
大隄接築長隄固是目前急務第黃水出路不暢若不急籌減落
之法僅恃增培隄岸豈能抵禦盛漲是切灘挑河亦係刻不容緩

之工見已黃水增長而嚴烜前奏挑河工程尙止約略估計並未切實勘辦該河督所司何事轉瞬桃汛卽屆不能再任延緩見既奏稱關家灘應行挑辦引河之處有民間私築土堰亟宜起除著該督卽飭屬剴切曉諭並親往該處詳加覆勘將關家灘等處河勢坐灣地方何處應切何處應挑察看形勢之緩急遴派妥員嚴實估計奏明妥速興辦勿稍遲延致失事機至高堰後應築二隄前據琦善奏稱止能見功於大隄有失之後不能豫固於大隄未掣之先持論固有所見惟此時隄身入水已深既不能於椿朽根鬆之處一律拆修而碎石護隄之說又迂遠而難行揆諸時勢自以興築二隄爲正辦二隄旣築大隄賴有重門保障又築格隄以爲後戢大隄自更有擎托是二隄之有利無弊其事顯然該督到清江一面勘辦挑切引河事宜一面卽將二隄工程勘估奏明次

第辦理如果於此外另有固隄蓄清善策朕必擇善而從並不稍存成見也○庚午禁各省教職佐雜干預公事○甲戌 上啓鑾謁 西陵○免經過地方額賦十分之三○戊寅 上謁 泰陵

泰東陵 昌陵回鑾○辛巳 上還京師

三月甲申諭軍機大臣等陶澍奏海船初運兌竣仍接續趕辦一摺本年初次試行海運據該撫奏截至二月二十一日止共兌過正耗米一百一十二萬二千餘石事機極爲順利惟海運米石除正耗漕白等米尙有給船耗米通計米數有一百六十三萬三千餘石各船不敷裝載不能不分兩次運送一過春夏之交南風司令北船回滬較難自應令初運沙船迅速回糧俾二運得資趕辦本日據天津鎮總兵克什德奏報長洲縣第十三號船一隻於二十九日早潮引進天津海口日內諒已陸續前來穆彰阿等接奉

此旨卽飭該鎮道等遇有海運抵津隨到隨剝不准片刻延滯並嚴飭坐糧廳稽察吏胥經紀人等如有刁難需索立即重懲毋稍姑息總令沙船卸米前往奉天買豆迅速回南以便趕辦二運又陶澍另片奏給船耗米將來兌交額糧後應有餘賸合計不下十萬餘石請查照糧船餘米之例就近官爲收買等語向來南糧餘米俱准在通變賣惟例價向有一定沙船糧船軍商各別若官爲收賣轉啓勒捐諸弊自應聽其自便著穆彰阿等查照天津時價出示曉諭如有願將耗米變價者卽聽該處民人照市價收買該商既可藉以沾潤於該處市價民食亦有裨益○諭據慶祥奏查明賊眾確實下落見在聚集多人勾連串結各布嚕特觀望狐疑不可專恃等語自係實在情形逆夷勾結匪黨分聚六處約有三四千人之多並敢於各要隘安設賊目馬匹互爲聲援情實可惡

亦由於畏懼我兵前往勦捕之故此時調派伊犁及烏嚕木齊官兵二千五百名次第到齊分駐各卡適中之地聲威不爲不壯該參贊大臣惟當選派幹練員弁勤加訓練如賊眾竟敢近我卡倫卽應統師迎勦大加懲創若隨卽遠颺斷不可輕易出師致墮奸計總期布置嚴密毋得稍失機宜該逆夷等句連煽惑以致附從日多各布魯特窺測遷延情殊黠猾若聽其日相聯結更恐滋蔓難圖計惟有陽示寬大設法以解散其黨與一面隨時確密偵探相機籌辦著慶祥剴切曉諭各布魯特中其效順者如能計縛渠魁自當立予懋賞卽從逆之汰劣克等若能悔罪投誠自相解散亦當待以不死酌予恩施並檄諭霍罕等處如各逆竄投毋許收留容庇若將首賊擒戮不但賞其頭人卽出力之散小布魯特亦著數明賞賜使其知感知畏庶可伸威蒞事慶祥惟當慎益加慎

勉益加勉以副委任○乙酉以祁墳爲貴州布政使周之琦爲浙

江按察使

由四川
茶道遷

○丁亥

上親耕藉田○己丑諭軍機大臣

等琦善奏查勘海口及切挑引河情形並籌辦運河隄閘飭估洪湖隄工一招前因高堰石工不固旣不能普律拆修不得不亟籌保護是以降旨令琦善將二隄工程勘估興辦茲據該督奏稱准揚道潘錫恩見有建築二隄不若增培大隄之稟並復細詢廳營俱稱建築二隄止可爲隄後保障而不能恃以蓄清二隄地勢較低大隄有失二隄仍不免有過水之虞與潘錫恩之言相同朕閱該道所稟將隄後二河展挑寬深所挑之土卽加培大隄東面不足再隔河取土幫成頂寬十丈坡用三收之大戩通隄一律似與蓄清較爲近理惟前此陳中孚等所請興築二隄加築格隄以爲後戩總係爲保衛大隄起見如果加培大隄更有把握自當擇善

而從著琦善卽親往查勘或應專辦大隄或再兼築二隄逐一將各工覈實估計迅速奏明興辦至該道所稟戽水通船一法從前既未經辦過自不宜冒昧輕舉見在黃水不能剋期消落而本年回空南下斷不能不開壩放行其戽水能否卽將清水擡高足資抵禦黃流不至有倒灌淺閣之虞琦善察看情形如果照辦可期得濟卽於盤壩漕糧完竣後先將加運銅船調集試行一切估辦開壩水車等項准其覈銷其增培接築兩岸河隄及切灘挑河各工該督見已詳勘撥銀趕辦務卽督飭道廳等照估挑築勒限汛前一律完工其關家灘地勢既勘與九套何家社有迎溜背溜之分未便徒糜經費著俟霜降水落後再行相機挑切其翻泥車一項亦疏濬成法該督已飭廳汛各官督令兵夫如法施行總期有裨刷滌庶免日增淤墊也○癸巳諭據張井奏熟籌早啓禦黃壩

一摺張井會勘南河情形悉心講求不分畛域甚屬急公於河務亦頗有識見著卽調補江南河道總督嚴烜調任南河正當河湖交病之時一籌莫展致禦黃壩至今不能啓放實屬辦理不善姑念其前在東河任內修守尙無貽誤著降三品頂帶署理河東河道總督以觀後效張井嚴烜俱各卽赴新任無庸來京請訓○諭軍機大臣等據琦善奏查勘江境湖河敝壞已極設法酌籌疏治五條除接築長隄逢灣取直該督等已奏明辦理嚴守閘壩由嚴烜另行酌定外其修復濬船築作平灘對壩非緩俟霜降後不能辦理並須一二年後方可收黃水落低之效未免緩不濟急本日又據張井奏熟籌早啓禦黃壩一摺據稱黃河病在中滿擬照阿桂改河避險導便繞避高淤由安東縣東門上下在北面另築新隄卽以北隄改作南隄中間抽挑引河約深一丈卽由東門工以

下導河改由北面傍舊河行走至絲網浜以下仍歸見在海口中
閒又無淤灘阻隔似可暢順東趨自東門工以上至禦黃壩不過
六十里去路既暢上必掣深計可落水四五尺以外見在黃水高
清水五尺二寸得黃水落低五尺餘則立啓禦黃壩展寬東清壩
並接長蓋壩挑偏清水暢出刷黃底淤更可攻盡彼時湖水不過
收七八尺其勢已可建瓴更無虞風浪傷及石工此時刻期趕緊
六七月閒可開設新河儻汛期已屆不妨先行勘估俟霜降後辦
理等語朕思黃河受病已久當此極敝之時若僅拘守成法加高
隄堰束水攻沙一時斷難遽收速效自應改絃更張因勢利導以
遂其就下之性且黃河淤墊既甚與其有意外之虞必致淹沒田
廬被災甚廣何如改河避險先以人力變之爲一勞永逸之計所
謂窮則變變則通矣至濱海一帶蘆葦沮洳並無城郭自屬無害

張井所奏甚合朕意惟遲至霜降後秋閒不能啓壩漕船仍難回
空何如乘大汛未屆之先剋期辦理見已明降諭旨將張井調補
江南河道總督著琦善卽會同張井親往履勘迅速估計務於六
七月閒開放新河啓除禦黃壩俾一切盤壩海運等費均歸節省
儻汛期已屆萬分不能趕辦亦須遴委妥員先行勘估俟霜降後
卽行辦理至需用經費據張井約略估計不過三百餘萬兩見在
估築高堰二隄及切灘挑河增培下游四廳兩岸隄工共需二百
數十萬兩果能如張井所議立有成效則前項工程皆可不辦計
所增不過數十萬兩又何必屑屑過計耶惟見在所籌二百數十
萬兩見有若干尙少若干著琦善等一併查明據實具奏張井摺
著並鈔寄琦善閱看○丙申移甯古塔防禦四員駐拉林添設筆
帖式二員○戊戌諭陶澍奏請嚴懲刀械匪徒一摺江蘇省徐邳

淮海一帶與皖豫山東接壤毗連匪徒出沒每以佩刀持械爲能始則三五成羣藉端嚇詐繼則肆意橫行兇搶擄殺最爲地方之害茲據該撫以此等佩執兇器匪徒偶然挾詐逞兇平日又無犯法實蹟按照本例僅止枷號杖責既未便照拽刀匪徒結夥搶奪及棍徒生事行兇之例強相比附而責釋之後故智頗萌轉以輕於嘗試長其犯法之心請援照四川廣東懲辦結匪棍徒之例鎖繫鐵桿以期小懲大誡著照所請嗣後江蘇徐淮揚三屬匪徒如有佩帶兇器刀械挾詐逞兇者一經拏獲每名鎖繫鐵桿一支重四十斤爲度定限一年果能改悔自新卽予釋放若不悛改再繫一年儻仍始終怙惡卽按其情節照棍徒屢次擾害行兇例分別從嚴究辦其接近江蘇之山東兗沂曹三府河南汝陳光等府州安徽潁鳳泗三屬民情强悍地界相連並著一體做照辦理以挽

頽風而安良善○己亥召繼昌來京調富呢揚阿爲浙江布政使

以裕泰爲湖南布政使

由安徽按察使遷

○庚子諭海運見已陸續到津

沙船餘米不下十萬餘石前經降旨照南糧餘米例聽天津民人照市價收買茲據英和奏沙船宜令速歸趕運二次米石恐該商等希圖賤價售買觀望不前請由部動用銀二十萬兩官爲收買著順天府卽派委妥員赴部領銀分起解往天津暫存道庫並著穆彰阿等於正米收竣後卽傳諭江南委員如有船戶願賣餘米聽該處民人照市價收買如該處不能銷售卽動項照市價官爲收買其價銀由江南委員轉發船戶毋得假手吏胥致啓勒捐短發諸弊俾沙船得以早歸無誤二次接運○以岳良爲安徽按察使

由陝西道遷

○先是直隸總督那彥成奏直隸界連山東河南二

省匪徒出沒無常必有窩家藏匪兵役包庇請嚴定盜賊窩主治

罪條例並酌改兵役包庇窩主專條下刑部議至是奏直隸一省
除強盜窩主應擬死罪者從重辦理外其有窩贓盜賊按名數多
寡分別發近邊極邊充軍兵役勾連盜賊坐地分贓於應得本罪
上加一等定擬俟該省盜風稍息再行奏復舊例從之○壬寅改
四川雅州府學訓導爲雅安縣學訓導○甲辰移福建閩安營都
司千總各一並撥兵駐琅崎島○戊申 上親騎射並御含輝樓
閱 皇子及侍衛騎射○己酉予唐臣陸贄從祀 文廟○以福
申爲左副都御史_{由大理}○庚戌諭軍機大臣等據琦善奏勘明
高堰石工請專辦大隄一摺前據陳中孚等請築二隄加築格隄
以爲後戢當經降旨令琦善親往查勘茲據該督奏親歷移建二
隄處所逐一履勘該處地勢較低必築至二丈八九尺方與大隄
相平以及加築格隄建設滾水石壩及建閘等項非動帑三百萬

不能興舉且不足恃者有五若專辦大隄卽有高二丈之石工以爲基址復再普加子堰視新築二隄又高數尺且幫成頂寬十丈坡用三收更以子堰直接海漫槽土復用坦坡以緩其勢後槽之掣亦輕約需銀一百七十七萬餘兩是二隄費多而無益大隄費省而有憑所見甚是前據張井奏改河避險湖水蓄至七八尺其勢已可建領高堰隄工皆可不辦茲據琦善奏黃水設法疏消不過落水五尺湖水仍不能不蓄至一丈四五必得隄堰鞏固以爲淮揚保障惟見屆農忙大汛將至派員雇夫均非易事著照所請將高堰境內六堡九堡十堡及十二十三十六十七等堡並山盱境內白頭堡至七堡暨信壩十三堡擇其最爲迎風犯浪緊要處所先行趕緊幫戩其全工則俟今秋明春辦理見已明降諭旨將潘錫恩授爲南河副總河該督惟當會同張井潘錫恩和衷商榷

總期高堰隄工永資鞏固毋使稍有疏虞朕擇善而從並不稍存成見也○賞江南淮揚道潘錫恩三品頂帶爲南河副總河○是月貸山西靈邱縣湖北荊州等五營被災兵丁倉穀緩徵開州等七州縣歉收新舊額賦

夏四月癸丑莊親王繇課薨賞治喪銀五千兩予祭葬諡曰襄○丙辰諭武隆阿奏校閱東省營伍據稱各營將弁年力弓馬均尙強壯惟登州鎮標右營都司夏存字弓馬生疏萊州營千總金洪烈步箭平常應請分別降革金洪烈著以把總降補夏存字著革去都司惟念該都司之父於嘉慶三年在湖北當陽縣巡檢任內堵禦川匪殺賊陣亡一門十口同日盡節加等予襲賞給雲騎尉世職該都司先由館班議敘未入流改補營員弓馬非所素習夏存字著加恩以府經歷縣丞改補歸部銓選仍留雲騎尉世職此

係朕垂念忠藎量予恩施嗣後不得援以爲例○戊午晉封靜貴人爲 靜嬪○賞南河副總河潘錫恩右副都御史銜○己未諭軍機大臣等琦善奏上年接運回空軍船阻守臨清聞外見已催過淮安三揚州二兩幫臨清聞存水僅三尺有餘船多水小至韓莊以上及邳宿運河全賴微山湖水今湖瀦不旺又距夏至甚近恐開壩過遲黃水盛漲各省漕糧不能迅速盤竣等語本年東省運河水勢不充臨清聞存水止三尺餘恐自開以上更多淺阻見在重運各船陸續到壩候盤設空船不能依期全抵楊莊致令數省軍剝船隻曠日久待裏楊一帶運河自必擁擠貽誤時屆農忙又值高堰興辦土工車驢人夫等項雇覓甚難此等小民豈能停待坐食若散而復聚益恐稽遲況此時東省運河空船行走尙且不能迅速將來重船北上何能浮送裕如必致時日耽延所關甚

大嚴煥因南河辦理不善調署東河自應知愧知奮勉贖前愆該
河督等接奉此旨迅卽督飭運河道廳上緊妥籌設法疏濬收蓄
俾提空進重毫無稽滯尙可以速補遲儻有疲玩員弁嚴參懲辦
如任其短絀致空重各船不能通行將來黃水盛漲不能盤竣惟
該河督及該撫是問恐不能當此重咎也○庚申改江蘇運河營
邳運汎把總爲千總蕭南營蕭汎千總爲把總○甲子 上諭

黑龍潭祈雨○庚午雨○

甲戌召張師誠來京以鄧廷楨爲安徽

巡撫徐忻爲陝西布政使

由內閣侍讀學士遷

○乙亥

上臨故莊襄親王

繇課第賜奠○諭逆夷張格爾

上年滋事潛逃私聚勾結茲復派

頭目赫爾巴什潛赴綽勒薩雅克愛曼一帶糾合夷眾經慶祥選

派將弁分起探拏復曉諭布嚕特比那帕斯等帶領百餘人隨同

官兵密往堵拏適赫爾巴什前來率眾格爾官兵回子等揚威齊

進該逆旋卽逃竄經薩底克追及擒獲並戮斃從逆七名拏獲一
 名餘俱帶傷遠竄赫爾巴什係上年戕害主事職銜法里那之要
 賊罪大惡極茲被擒獲足以彰國憲而紓義憤慶祥自調任參贊
 以來於一切防堵事宜辦理認真事機極爲順利著頒賞白玉四
 喜搬指一箇黃辦荷包二箇以示嘉獎如能將各首逆設法殲擒
 必當加以懋賞那帕斯不避嫌疑深明大義前已加賞二品頂帶
 此次著賞給大段四匹薩底克富先奮勇生擒要犯尤爲出力著
 賞給五品頂帶花翎並銀二百兩噶勒奇雅探信擒賊著賞給六
 品頂帶並銀一百兩所有傷亡布魯特三名受傷二名查明咨部
 照例卹賞派往之西朗阿富尼雅杭阿及伊斯瑪依爾俱著以應
 升之缺升用金頂回子庫爾班差探得力著賞給六品頂帶藍翎
 遇有七品伯克缺出儘先補放其餘出力之弁兵回子著分別獎

勵該參贊仍當乘機妥辦速奏膚功以副委任○諭軍機大臣等
慶祥奏拏獲戕官逆夷並差探見在情形已明降諭旨分別加恩
獎勵矣逆夷張格爾等自知罪在不赦潛遣赫爾巴什前赴綽勒
薩雅克愛曼一帶以圖糾結情殊狡詐該參贊分派將弁並曉諭
那帕斯等隨官兵將赫爾巴什首先擒獲並殲斃從逆七名拏獲
一名辦理妥速事機順利覽奏欣悅見據邁瑪薩依特玉努斯等
查明張格爾等因托古斯托羅人多糧缺差奇比勒迪帶人到沖
巴噶什愛曼附近巴雅爾一帶欲種地以資口食奇比勒迪係著
名逆黨其手下人托克綽爾即係槍傷巴彥巴圖墜馬之犯該逆
見離巢穴其愛曼距卡甚近正可設法擒捕毋使積糧聚眾以爲
抗拒之計該參贊即傳知見派之科凌阿等帶領壯兵回子及占
帕拉特等指示機宜就地殲擒固不可貪功深入亦不可坐失事

機再赫爾巴什等所供張格爾因官兵雲集意欲先赴霍罕再看機會汰劣克等與張格爾意見不合該參贊正可趁此機會於效順布嚕特中剴切曉諭懸賞購綫設法誘擒或令自相殘食藉收以夷制夷之效至赫爾巴什本當亟正刑誅但須暫留查訊張格爾游奕蹤迹俟拏獲要犯時亦須該犯質認可牢固監禁毋令殞斃也○丙子賜朱昌頤等二百六十五人進士及第出身有差○是月給江蘇沛縣災民口糧貸江蘇徐州鎮三營湖北德安宜都二營災區兵丁銀穀緩徵山東德州等三十一州縣衛歛收新舊額賦並漕項雜款展緩山西隰州連穀

五月壬午改福建彰化縣海豐港口歸嘉義縣笨港縣丞轄烏石港口歸頭圍縣丞轄○甲申諭逆夷張格爾前因人多糧缺遣奇比勒迪帶多人潛赴巴雅爾一帶意圖種地聚糧當經降旨以該

逆見離巢穴正可設法擒捕本日慶祥奏到派委員弁密探奇比勒迪出入蹤迹經占帕拉特率其屬眾就山設伏鐵雜克拜帶人前往引誘該逆帶領多人甫進山口官兵回子槍箭齊施該逆惶急奔逸鐵雜克拜奮勇當先將奇比勒迪登時槍斃餘逆悉數就殲奇比勒迪係巴斯奇斯愛曼大頭人與汰劣克句結滋事上年首先率眾戕害官兵其手下人復槍斃巴彥巴圖茲復與張格爾聚謀種地實屬大逆不法此次旬日之內將助逆首犯節次擒誅所辦甚合機宜允宜懋加恩賚以示獎勵占帕拉特情殷效順實心探誘可嘉之至伊本係四品翎頂著加恩賞給二品頂帶鐵雜克拜深入誘賊槍斃首逆著賞給五品頂帶花翎並照賞格頒賞誘賊殺賊之商伯克布嚕特等銀兩協領科凌阿著交軍機處記名遇有領隊大臣缺出奏請簡用出力之佐領伯克弁兵等俱照

所請分別升用賞給翎頂邁瑪薩依特深知大義俟再有成效卽
當立予恩獎慶祥籌畫有方調遣均能得力洵屬能事著先行交
部議敘見在助惡首逆疊被擒誅張格爾等自已聞風膽落且糧
乏勢窮誅鋤更易該參贊富趁此聲威益加懋勉俾渠魁悉數殲
除邊圉日臻綏靖俟全案告竣朕必渥予恩施○己丑諭富俊奏
移駐京旗請再添設總副屯達等語雙城堡移駐京旗前經富俊
奏准分左右翼各設總副屯達二名以資約束茲據奏稱京旗陸
續移駐二百七十戶分撥中屯兩翼四十屯居住計一總屯達經
管二十屯道路紆遠勢難兼顧雖設有副屯達並無頂帶難資差
遣著照所請准照吉林中左右三屯之例每一旗五屯再添總副
屯達各六名總屯達著賞戴金頂每名月給工食銀一兩遇閏加
增一月由撥餘項下動支其副屯達亦著賞給虛金頂不必給予

工食與總屯達一體稽察戶口呈報事件著卽由京旗開散內挑選充補○諭軍機大臣等琦善等奏勘明安東改河工程恐尙有窒礙請啓放王營舊減壩以期掣溜通漕一摺南河黃高於清以致河湖交敞運道不通前此張井建議由安東改河以爲黃水卽可掣低禦壩卽可啓放見旣覆勘籌商多有窒礙不若開放王營舊減壩之較爲得力著卽照該督等所議辦理見屆大汛不遠未能剋期興辦自應視糧船回空之早遲定啓壩之時日彼時已屆秋深水勢旣定且民間秋稼登場漫水下注之處當不至大傷田廬惟一切應辦事宜均須豫爲籌議將來黃水一經奪溜必使清口以下卽可掣淤清水暢出刷滌深通卽趕緊堵合俾全黃仍歸故道漕運永復舊規該督等當加意慎重勉之又勉方爲不負委任所有開壩挑河堵合口門並一切土埽工程及撫恤事宜共需

銀三百數十萬兩已飭該部豫爲籌款俟秋初該督等奏撥時卽可迅速撥解工次以資應手○壬辰蘇明阿緣事降調以繼昌爲

江西布政使

前任浙江布政使

○甲午諭朕恭閱

皇祖高宗純皇帝實

錄內載乾隆四十一年十月奉

上諭向來各省地方有拏獲鄰

省盜犯尙令引見錄用以示獎勵若爲知府直隸州者能將審轉之案秉公研鞫立予平反則所屬可無冤民較之實心緝盜尤有益於吏治嗣後凡知府直隸州有將關繫生死出入大案審出情實改擬得當經上司覈定題達部議准行者交該部查明奏請送部引見著爲令等因欽此仰見我皇祖慎重民命激勵官方至意國家設官分職大小相維各州縣案件由該管知府直隸州審轉其直隸州案件由該管巡道審轉原因督撫藩臬統轄全省尙恐耳目難周道府直隸州於所屬最爲切近分其職任正以專其

責成所屬各員是否廉明案件有無屈抑果能隨時留心秉公查察斷不至受其愚蒙況 聖訓煌煌垂爲功令有善必錄亦何憚而不爲乎乃近年以來從未有道府直隸州於所屬之案平反得情經督撫題達部臣查明奏聞者總由積習既深官官相護平時因循疲玩置民瘼於不問遇有案件又務博寬厚之名扶同徇隱以致各州縣中多有昏愎不職顛倒是非甚或恣意貪婪肆無忌憚卽如山西省閻思虎一案幾致烈女含冤特交刑部提訊始將淫兇之犯明正典刑又浙江徐倪氏一案經年累月未成信讞經特簡撫臣臬司並特派大臣會同覆勘方能罪人斯得此等重要案如果該管道府等卽時審出實情據實稟揭一經奏聞朕必立加恩賞乃一味展轉回護固結而不可解迨至水落石出承審官固罪無可逭而該管上司俱罹重譴辱身敗名悔之何及嗣後各省

道府直隸州務當激發天良破除積習勿徇情面勿避嫌怨果能
於所屬之案審出實情改擬得當罪關生死出入者著該督撫據
實題奏該部查明隨案奏請送部引見以示鼓勵儻仍蹈徇庇故
轍致令冤獄難伸一經發覺定行加重治罪朕賞罰一秉大公不
能曲爲寬貸也○乙未穆克登額以病免以松筠爲禮部尙書那
清安爲左都御史由熱河都統遷○丙申睿親王端恩薨賞治喪銀二千
兩○丁酉雲貴總督趙慎畛卒贈太子少保賜祭葬諡文恪予其
子戶部候補主事敦詩服闋後遇缺卽補○戊戌調阮元爲雲貴
總督李鴻賓爲兩廣總督以嵩孚爲湖廣總督明山爲刑部尙書
由熱河都統遷○己亥截留漕米五萬石備直隸大名府屬賑需○以山
東東昌府屬旱災暫免利津海豐二海口商販糧稅○宗人府奏
嗣後宗室覺羅婦女遇事控訴令抱告具呈禁止自行呈控從之

○辛丑署刑部右侍郎韓對以病乞回籍允之○添設江南林家墩汛千總一外委二○免直隸河間等五縣積水地畝通賦○乙巳溶山東泇河廳屬河渠○丙午諭軍機大臣等寄諭兩江總督琦善江南河道總督張井副總河潘錫恩據給事中楊煊奏啓放王營減壩關繫重大援據嘉慶十一年開放減壩旋有上游之周汛三堡郭家房蘇家山三次漫口及十六年減壩漫缺旋有上游之棉拐山李家樓兩處漫口各成案以爲黃溜湍急鹽河勢難容納且下游安東海州境內有葦灘山根攔截阻遏往往挂淤倒漾等語本年開放王營減壩非爲減洩盛漲起見旣與嘉慶十六年漫缺情形不同亦與十一年開放成案各異前據該督等會同籌議摺內已將應培應加之圍堰官路奏請分別培築自必中有把握不至蹈從前上壅下潰故轍事關全河大局欲其斗落黃水迅

開禦壩下游少有漫淹原所不免且在秋收以後想亦不至成災
惟該給事中既有此奏亦不可不加意詳慎將來開放減壩必期
去路通暢其上游隄岸各工及一切應培應加圍堰亟須倍加保
護慎重妥籌毋使稍有疏虞是爲至要○裁貴州耶岱廳屬苗弁
○己酉裁撤嘉峪關外按月會哨弁兵○是月給山東堂邑等十
二縣旱災口糧貸直隸廣平等五縣山東堂邑等十二縣河南臨
漳等十二縣山西陽州營口糧籽種倉穀緩徵直隸廣平等五縣
河南睢州等二十八州縣山東東阿等四縣旱災新舊額賦並漕
項雜款

六月乙卯諭軍機大臣等孫爾準奏臺灣匪徒分類焚搶檄調鎮
將帶兵圍捕一摺臺灣嘉義彰化地方有匪徒糾眾焚搶據奏係
賊匪李通與粵民黃文潤挾嫌糾起釁何以數日之間卽蔓延

兩邑地方糾夥甚眾竟敢抗拒官兵是否卽係李通黃文潤爲首抑另有著名首惡乘機煽聚以致附和之眾日益增多必當就地殲除迅速撲滅庶不至滋蔓難圖昨據許松年奏報已馳往查辦該督見飭該鎮道出示曉諭散其黨與並檄調副將邵永福等帶兵在艋舺堵禦防其北竄並調總兵陳化成帶兵會同許松年蔡萬齡三面兜擒所辦悉合機宜該督務卽檄飭在事各員一面迅速勦捕一面訪察爲首匪徒嚴拏究辦勿得稍留遺孽該督前此奏請俟韓克均到任後來京陛見見在臺灣有匪徒滋事之案著暫緩起程俟此案查辦完竣再行前來可也○丁巳改盛京奉天府屬岫巖理事通判爲岫巖鳳凰城海防通判○免山東軍需攤廉未扣銀九十五萬餘兩○庚申慶祥奏奇比勒迪之子胡達巴爾底姪伊斯瑪依爾潛至奇里克愛曼一帶遊奕窺伺派兵擒獲

正法得旨嘉獎○以韓鼎晉爲倉場侍郎

由左副都御史遷

○內務府奏

逃走太監治罪例初次逃走投回責六十送進宮差減食五錢賞

銀一年被獲及二次逃走俱係投回均責六十發吳甸劍草一年

二次逃走內有一次投回責八十發吳甸劍草一年半俱係被獲

責一百發吳甸劍草二年三四五次逃走無論投回被獲均責一

百三次發吳甸劍草三年四次五年五次五年劍草未滿年限逃

走及五年期滿交進後復行逃走無論投回被獲俱永遠枷號從

之○癸亥韓鼎晉以病乞假允之以湯金釗兼署倉場侍郎

由禮部

○丁卯諭軍機大臣等據張井等奏籌防黃河隄岸並分減湖

漲情形見在甫交初伏順黃壩長水三丈九尺一寸比較上年盛

漲大一尺七寸比較道光二年盛漲最大年分大一尺一寸均經

先期籌備足資抵禦惟洪澤湖水見長至一丈七尺四寸已放三

河兩壩水勢仍有長無消擬啓放蔣家壩以南之閘湖壩並行知揚河廳營啓放車南中新四壩揚糧廳營除昭關壩不放外其餘歸江各壩全行啓放等語張井等因河湖同時驟漲援照嘉慶二十四年成案啓放攔湖壩並啓揚河揚糧各壩意在騰空河面豫備漲水下注爲此不得已之舉此時琦善計已馳赴清江防汛務須會同張井潘錫恩和衷籌辦竭力圖維諄飭各廳營等加意巡防嚴守隄岸勿令稍有疏失其黃河水勢盛長防守尤關緊要卽嚴飭防汛弁員督率兵夫無分雨夜相機搶護不得稍懈至揚糧廳屬甘泉汛東西兩岸甄石工段內除保固限內新工十五丈七尺照例飭令賠修外應修舊工一百三十三丈七尺著飭趕緊估修以資保障此次經該河督等將湖漲分減自當水勢日消化險爲平卽著該督等由驛奏聞以慰廑注○以海運妥順予琦善議

敘賞陶澍花翎○戊辰賞張青選三品卿銜爲兩淮鹽政以翟錦

觀爲福建按察使

由廣東鹽運使遷

○己巳諭軍機大臣等許松年奏查

辦臺灣匪徒械鬪一案及堵緝獲犯各情形所奏甚爲明晰臺灣漳泉粵三籍民人獷悍尙氣該匪等焚搶彰嘉兩縣均係隨地糾邀各有首夥並非合而爲一亟宜撫良捕匪以靖地方毋任滋蔓見在該道孔昭虔駐臺灣該鎮蔡萬齡駐艋舺提督許松年卽駐大甲地方調度北可應接竹塹南可控制彰嘉惟三屬道里綿長路徑紛雜處處均應設兵堵緝以鎮人心該提督因官兵不敷差遣飛調內地勁旅三千名節經孫爾准奏到已調金門鎮總兵陳化成帶兵五百名署閩安協副將邵永福升補澎湖遊擊謝建雍帶兵三百名渡臺防堵續調省標兵三百名延平協標兵二百名興化協標兵五百名交候補副將崇福興化協副將佟權等渡臺

堵捕尙不敷兵一千二百名孫爾準接到許松年札致想已調派
令其東渡矣許松年久歷行間明白能事此次臺灣匪徒滋事卽
責成該提督迅速辦理先行出示曉諭散其黨與總使人心平服
自易安撫至接捕各犯務期趕緊殲剿勿留餘孽兵貴神速與其
觀望遷延老師糜餉何如厚積兵力一鼓殲擒既可綏靖地方兼
可節省糜費孫爾準見在廈門策應調度所有臺灣應用軍火糧
餉賞項總須源源接濟隨到隨發俾得應手趕辦並於閩浙二省
中平日稔知得力鎮將卽飛檄調赴交許松年調遣至該匪等膽
敢播造謠言乘機焚搶自係該處地方官平日因循疲玩聽斷不
公緝捕不力以致養癰貽患孫爾準自必有所聞見著卽據實具
奏毋稍袒護許松年見在臺灣聞見尤切著該提督明查暗訪據
實奏聞無許瞻徇情面儻有不實不盡經朕別有訪聞惟許松年

是問○辛未以李宗瀚爲左副都御史

開左副都御史

○癸酉申命各

督撫嚴懲奸胥墨吏○乙亥慶祥奏擒斬助惡逆首邁瑪呼里得

旨嘉獎○丙子諭張井等奏湖河異漲消減工程平穩覽奏不勝

嘉悅本年甫交初伏湖河並漲經該河督等督飭防守並啓放攔

河等壩幸得化險爲平此皆仰賴 上天垂佑朕心曷勝欽感著

發去大藏香十炷交張井潘錫恩分投虔赴 河神廟暨 風神

廟 湖神廟代朕敬謹祀謝以答 神佑此時正屆伏汛以後秋

汛方長計琦善日內當已馳赴清江防汛務須會同張井潘錫恩

和衷籌辦竭力修防諄飭道將廳營嚴守隄岸務保安瀾不可稍

有疏虞又另片奏堰圩兩廳新舊石工見在尙未能興工培補不

得不以碎石擇要優護與辦理碎石坦坡不同據該河督等先將

顯露各段購辦趕拋此次大水並未掣卸已著成效著迅飭兩廳

各堡斟酌形勢緩急分貯碎石備用所需銀兩卽在河庫存項動支務令工歸實用無任藉端冒混○庚辰諭軍機大臣等琦善奏河湖盛漲赴清江籌議防備並將張井等函商奏聞一摺本年春間張井奏改河爲一勞永逸之計惟言其不便者甚多旋據琦善會同張井等勘明安東改河工程恐有望礙請啓放王營舊減壩以期掣溜通漕當降旨照該督等所議辦理本日又據琦善奏張井復申改河前議似此遲疑不決豈不又如嚴烜之欲辦碎石坦坡延宕經年坐失機會無論改河事多格礙且時日迫促亦萬難趕辦禦黃壩業經兩年不開本年軍船必須全數回空明年重運必當照常行走既據該督等會籌定議道將廳營皆謂減壩可行此時卽應堅持定見及早辦理毋再游移觀望時屆立秋漕船回空瞬至儻啓壩稍緩空船歸次稍遲尙無大礙若竟遷延貽誤將

來漕船不能回空並誤明春重運朕惟琦善張井潘錫恩三人是問決不寬貸○命嵩孚編查苗疆客民保甲○是月賑湖北江陵當陽二縣水災給河南臨漳等七縣旱災口糧貸直隸大名鎮標等七營被旱兵餉